

Inventar

Über zwanzg Johr bine bei da Firma
A hoiwads Lebmn werkld dahi
Ja über zwanzg Johr bei der soibm Firma
bine Inventar, oda bine no I ?
I woid noch obm, do ware konsequent
I hob scho nebam Chef hiparkt
De Firma war aufamoi insolvent
Des war mei erste Herzinfarkt

Oh mei oh mei so fertig ...

Über dreißg Johr bine bei meina Frau
A hoiwads Lebmn werkln mia zwoa scho dahi
über a dreißg Johr mit der soibm Frau beinand
Is sie Inventar, oder is sie no sie ?
oamoi hobe mit na andan gschlaffa
Gefühle san oft recht vertrackt
Mei Frau is ma dann davoglaffa
des war mei zwoada Herzinfarkt

Oh mei oh mei so fertig ...

Seit über Fuchzg Johr stecke in mein Körper
Des ganze Lebmn werkln mia zwoa scho dahi
Ja über Fuchzg Johr im seubm Körper
isa Inventar, oda bin des i
seit Wochen dua i gsünda lebmn
min Doud hob i scho Sichtkontakt
i sauf Doppelherz, friß Omega 3
aus Angst vorm dritt'n Herzinfarkt



**Oh mei oh mei so fertig
dermasen im Arsch ware no nia**

**Oh mei oh mei so fertig
I hob gmoand, es geht's dahi mit mia**